

Na osnovu člana 4.2. i 4.7. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03, 76/09 i 1/11), člana 33. Poslovnika o radu Državne regulatorne komisije za električnu energiju ("Službeni glasnik BiH", broj 2/05) i člana 51. stav (7) Pravilnika o licencama – Prečišćeni tekst ("Službeni glasnik BiH", broj 63/16), na sjednici Državne regulatorne komisije za električnu energiju, održanoj 11. marta 2020. godine, donijeta je

ODLUKA O PRODUŽENJU SUSPENZIJE PRIVREMENE LICENCE

1. Produžava se suspenzija privremene licence za obavljanje djelatnosti međunarodne trgovine električnom energijom, izdata Društvu "Aluminij Trade" d.o.o. Mostar, registracijskog broja 05-28-12-131-18/18, do njenog isteka, odnosno do 31. maja 2020. godine.
2. Ova Odluka stupa na snagu danom donošenja. Dispozitiv Odluke bit će objavljen u "Službenom glasniku BiH" i službenim glasilima entiteta.

Obrazloženje

Društvu "Aluminij Trade" d.o.o., sa sjedištem u Mostaru, Baćevci bb, Odlukom Državne regulatorne komisije za električnu energiju (u daljnjem tekstu: DERK) broj 05-28-12-131-18/18 od 23. maja 2018. godine, izdata je privremena licenca za obavljanje djelatnosti međunarodne trgovine električnom energijom, na period od 1. juna 2018. godine do 31. maja 2020. godine.

Vlasnik privremene licence je zahtjevom od 13. marta 2019. godine, zavedenim pod brojem 05-28-12-137-1/19, tražio suspenziju privremene licence, počev od 1. aprila 2019. godine.

Postupajući po podnesenom zahtjevu, a imajući u vidu odredbe člana 51. stav 9. Pravilnika o licencama – Prečišćeni tekst koje ograničavaju trajanje suspenzije licence po zahtjevu vlasnika na najviše godinu dana, Odlukom DERK-a broj 05-28-12-137-7/19 od 27. marta 2019. godine, izvršena je suspenzija predmetne licence počev od 1. aprila 2019. godine, a najkasnije do 31. marta 2020. godine.

Tokom trajanja tražene suspenzije, vlasnik privremene licence nije iskazivao interes za ponovno obavljanje djelatnosti međunarodne trgovine električnom energijom, odnosno nije upućivao zahtjev za prestanak suspenzije.

Imajući u vidu da je DERK-u dostavljeno Rješenje Regulatorne komisije za energiju u Federaciji Bosne i Hercegovine (FERK) broj 06-03-139-04/3/19 od 27. februara 2019. godine, kojim je Društvu "Aluminij Trade" oduzeta dozvola za snabdijevanje električnom energijom – dozvola II reda, a polazeći od činjenice da tražena suspenzija ističe zaključno sa 31. martom 2020. godine, DERK je od navedenog Društva, aktom broj 05-28-12-56-1/20, tražio da do 15. februara 2020. godine dostavi dokaze da su ostvarene pretpostavke za ponovno izdavanje odgovarajuće licence FERK-a. Istim aktom Društvo je upoznato sa aktivnostima koje DERK namjerava poduzeti, ako se u ostavljenom roku ne dostave traženi dokazi.

Iako je navedeni akt DERK-a vlasniku privremene licence uručen 7. februara 2020. godine, u ostavljenom roku, ali ni naknadno, nije potvrđeno da su ispunjene pretpostavke za ishodovanje odgovarajuće licence FERK-a, niti se vlasnik licence očitovao da više ne namjerava obavljati djelatnost međunarodne trgovine električnom energijom.

Shodno tački 2.1. Standardnih uvjeta za korištenje licence za obavljanje djelatnosti međunarodne trgovine električnom energijom (u daljnjem tekstu: Standardni uvjeti), vlasnik licence je dužan permanentno ispunjavati opće i specifične kriterije utvrđene Pravilnikom o licencama. Jedan od posebnih kriterija za izdavanje licence za obavljanje djelatnosti međunarodne trgovine električnom energijom, utvrđen članom 30. stav 1. tačka e) Pravilnika o

licencama – Prečišćeni tekst, jesu ostvarene pretpostavke za izdavanje odgovarajuće licence entitetskih regulatora, prije početka obavljanja djelatnosti međunarodne trgovine na osnovu licence DERK-a. Dakle, pored toga što podnosilac zahtjeva mora dokazati da su ostvarene pretpostavke za izdavanje odgovarajuće licence entitetskih regulatora u trenutku odlučivanja DERK-a o zahtjevu za izdavanje licence za međunarodnu trgovinu električnom energijom, vlasnik licence taj kriterij mora ispunjavati permanentno tokom trajanja licence DERK-a, odnosno u svakom trenutku posjedovati licencu entitetskog regulatora ili barem dokazati da su ostvarene pretpostavke za njeno izdavanje.

Društvo "Aluminij Trade" nema dozvolu FERK-a, niti je na poziv DERK-a, u ostavljenom ili razumnom roku, dokazalo da su ostvarene pretpostavke za izdavanje odgovarajuće dozvole entitetskog regulatora, što eksplicira kršenje odredbe 2.1. Standardnih uvjeta.

Pored navedenog, aktom broj 05-28-12-56-1/20 od 4. februara 2020. godine, DERK je licenciranom subjektu prezentirao radnje i aktivnosti koje treba poduzeti, kako za slučaj namjere nastavka obavljanja, tako i za namjeru prestanka obavljanja licencirane djelatnosti. Uvažavajući pravo licenciranih subjekata da trajno prestanu obavljati licenciranu djelatnost, DERK je istim aktom ukazao Društvu "Aluminij Trade" na koji način će konkretizirati ovu namjeru, ukoliko ista postoji. Međutim, po traženju DERK-a, izostala je bilo kakva reakcija ili očitovanje vlasnika licence.

Demonstrirana pasivnost i potpuna nezainteresiranost vlasnika privremene licence da se očituje o svojim namjerama u pogledu obavljanja licencirane djelatnosti ili da prigovori daljnjem postupanju DERK-a koje je najavljeno u slučaju propuštanja očitovanja vlasnika licence, jesu činjenice koje impliciraju nemogućnost ostvarivanja bilo kakve komunikacije i saradnje licenciranog subjekta i nadležnog regulatora.

Pored toga što izostanak dokaza da su ostvarene pretpostavke za izdavanje odgovarajuće dozvole entitetskog regulatora sam po sebi predstavlja kršenje tačke 2.1. Standardnih uvjeta, sve navedene činjenice u svojoj ukupnosti daju dovoljno osnova za stav da je u konkretnom slučaju riječ o većem stepenu, odnosno naročitom kršenju odredbi uvjeta za korištenje licence, te je, na osnovu člana 51. stav (7), a u vezi sa stavom (8) Pravilnika o licencama – Prečišćeni tekst, donijeta odluka kao u dispozitivu.

U skladu sa članom 9.2. Zakona o prijenosu, regulatoru i operatoru sistema električne energije u Bosni i Hercegovini, protiv ove Odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana prijema.

Broj: 05-28-12-56-2/20
11. marta 2020. godine
Tuzla

Predsjedavajući Komisije
Suad Zeljković